

جریدہ علیہ

مشیت جلیلہ اسلامیہ نمک جریدہ رسمیه سیدر

غرة ذی الحجہ ۱۳۳۲

عدو: ۶

آیدہ بر نشر اولنور

برنجی سنہ

فتوای شریفہ

صلوات ، جمعہ :

برجامع شریفہ خطیب اولان زید صلوۃ جمعہ ایچون خطبہ قرائت ایدر اولدقده .
خطبہ نیتلہ آنجق « الحمد لله » یا « لا اله الا الله » یا خود « سبحان الله » دیوب ماعدانسنه او قوماسه
فرض اولان خطبہ ادا ایدلمش اولورمی الجواب : اولور .

بوصورتنده اول وجهله ادا اولتان خطبہ مکروهه اولورمی الجواب : اولور .

*

**

برقریه اهالیسی کثیر اولوب یایلاقلرنده اولان مسجدلرینه جماعتی صغیشماسه اهالی*
مذکورہ دن زید اول مسجدی جامع ایتدکده دروننده صلوۃ جمعہ وعیدین اقامتی اذن .
سلطانی صدورینه متوقف اولورمی الجواب : اولور .

*

**

تکلیف :

زید سنا کندودن اصغر اولان قرنداشی عمرو متوفاتک زوجہ سی ہندی بعد اتقضاء العینہ
تزوج ایتک جائز اولورمی الجواب : اولور .

*

**

زید آخر دیارده ایکن زوجہ سی ہند نفسی عمروہ تزویج ایلسہ عقد مزبور صحیح
اولورمی الجواب : اولماز .

*
*
*
زید مفقودك حقیقہً یا حکماً موتی ثابت اولدین زوجہ سی ہند نفسی آخرہ تزویجہ
قادرہ اولورمی الجواب : اولماز .

*
*
*
زید زوجہ سی ہندك اوکی اناسی زینبی ہندك اوزرینہ تزویج ایدوب ہند ایلہ جمع
ایتمک جائز اولورمی الجواب : اولور .

*
*
*
زید مسلم تولد ایدہ جك ولد نصرانی اولمق اوزرہ ہند نصرانیہ حریبہ بی نکاح
ایتمک مع الکراہہ صحیح و ولد مسلم اولوب ولدك نصرانی اولسی شرطی لغو اولورمی
الجواب : اولور .

*
*
*
زید مسلم دار حربہ ہند نصرانیہ بی عمرو و بکر نصرانیلر محضرلندہ تزویج ایلسہ
مع الکراہہ صحیح اولورمی الجواب : اولور .

*
*
*
زید مسلم دار حربہ ہند نصرانیہ بی شہود محضرلندہ تزویج ایلسہ مع الکراہہ
صحیح اولورمی الجواب : اولور .

*
*
*
ہند صغیرہ بی ولی اقربی اناسی زینب مہر مثلیہ کفوی زیدہ تزویج ایتد کدن صکرہ
ہند بالغہ اولدینی آندہ نفسی اختیار و اشہاد ایدوب خیار بلوغلہ عقد مزبوری زیدك
حضورندہ حاکمہ فسخ ایتد رمکہ قادرہ اولورمی الجواب : اولور .

*
*
*
زید سن ایاسہ داخل اولوب حیضدن کسیلان زوجہ مدخول بہاسی ہندی تطلیق
ایلسہ ہندك عدتی اوچ آی مرورندہ منقضیہ اولورمی . الجواب : اولور .

*
*
*
*
*

رضاع:
زید نسباً قز قزنداشی هندك رضاعاً قزی زینبی تزوج ایتك جائز اولورمی .
الجواب : اولماز .

*
*
زید رضاعاً قزنداشی عمروك نسباً قز قزنداشی هندی تزوج مراد ایتدكده هند
زیدك والده سنی اممش اولما یحق هندی تزوج جائز اولورمی . الجواب : اولور .

*
*
زید هندی تزوج ایتدكدنصره زید وهند رضاعاً قزنداشلر اولدینی وجه شرعی
اوزره ثابت اولسه هند زیددن تفریق اولنق لازم اولورمی . الجواب : اولور .

*
*
زیدك زوجہ سی هند زیددن اولان سود ایله عمروی مدت رضاعده ارضاع ایلسه
عمرو زیدك زوجة اخرادن اولان اوغلنك قزی زینبی تزوج ایتك جائز اولورمی .
الجواب : اولماز .

*
*
زید رضاعاً قزنداشی عمروك نسباً قزنداشی برك نسباً قزی هندی تزوج مراد
ایتدكده بكر وهند زیدك والده سنی اممشلر اولما یحق هندی تزوج ایتك جائز اولورمی .
الجواب : اولور .

*
*
هند زیدك اوغلی عمروی برك قزی زینب ایله مدت رضاعده ارضاع ایلسه عمرو زینبی
تزوج ایتك جائز اولورمی . الجواب : اولماز .

*
*
طلاق:
« شرط اولسون ، دیمك عورتم بوش اولسون دیمك معناسنه متعارف اولان بلده
اهالیسندن زید زوجة مدخول بهاسی هنده » اكر عمروك منزله كیررسك شرط اولسون ،
دیدكدنصره هند عمروك منزله كیرمكله زیددن طلاق رجعیله بوش اولسه طلاق اخیر

اولم ایچق حالا زید عدتی ایچنده هنده مرا. بت ایدوب تجدید نکاح ایتدین هند ایله ازواج
معامله سنه قادر اولورمی . الجواب : اولور

*
**

جنون مطبق ایله مجنون اولان زید زوجہ سی ہندی اوچ طلاق ایله تطلیق ایلسہ
طلاق واقع اولورمی . الجواب : اولماز

*
**

زید زوجہ سی ہند ایله چکشد کده ہندہ « وار یقل کیت » دیوب لکن طلاق نیت
ایلماسہ ہند مبانہ اولورمی . الجواب : اولماز

*
**

زید زوجہ سی ہند حرہ بی مادون ثلاث ایله باینّا تطلیق ایلسہ زید ہندی رضاسیہ
بلا حله تزوجہ قادر اولورمی . الجواب : اولور

*
**

زید زوجہ مدخول بہاسی ہندی تطلیق ایدوب بعدہ عمرو زیدہ « ہندی قاج طلاق
ایله بوشادک » دیو سوال ایتدکده زید « اوچ طلاق ایله بوشادم » دیو اقرار ایلسہ زید ہندی
بلا حله تزوجہ قادر اولورمی الجواب : اولماز .

*
**

زید زوجہ سی ہند عقیفہ « برہ زانیہ » دیوقذف ایتمکلہ ہند زیدی موجبی ایله
مطالبہ ایدوب شرائط لعان موجودہ اولمغلہ لعان تکلیف اولندقدہ زید نفسی تکذیب
ایتمیوب لعاندن ابا ایتماکلہ وجہ شرعی اوزرہ تلاعن ایتدکدرندہ قاضی ہندی زیددن
تفریق ایلسہ ہند زیددن مبانہ اولورمی الجواب : اولور .

بوصورتہ ہندک عدتی منقضیہ اولنجیہدک نفقہ سی زید اوزرینہ لازم اولورمی الجواب :

اولور .

*
**

زید زوجہ مدخول بہاسی ہندی طلاق رجعی ایله تطلیق ایتدکدنصکرہ طلاق اخیر

اولم ایچق زید هنده عدتی ایچنده مراجعت ایدوب تجدید نکاح ایتدین هند ایله ازواج
معامله سنه قادر اولورمی الجواب : اولور .

*
**

« سندن کچدم » مفارقت ایتدم معناسنه متعارف اولان بلده اها لیسندن زید مذاکره
طلاق ائناسنده « زوجه هنددن کچدم » دیسه هند مبانه اولورمی الجواب : اولور .

*
**

زید زوجه مدخول بهاسی هنده « سنی تطلیق ایتدم » دیسه واقع اولان طلاق رجعی
اولورمی الجواب : اولور .

*
**

زید هندی تزوج ایتدکنصکره قبل الدخول هندی اوچ طلاق ایله تطلیق ایلسه
زید هندی بلا حله تزوجه قادر اولورمی الجواب : اولماز .

*
**

زید هندی تزوج ایدر اولدقده طلاق امری هندک یدنده اولوب دیلدیکی وقتده
کندوی تطلیق ایتک اوزره تزوج ایلسه ایجاب هند طرفندن اولیجق هند نفسی تطلیقه
قادره اولورمی الجواب : اولور .

*
**

هند زوجی زیده « مهر مدن فارغه اولق اوزره بی تطلیق ایله » دیدکده زید دخی
قبول ایدوب هندی تطلیق ایلسه هند نادمه اولوب مجرد لفظ خلع بولنمادی دیو مهرنی
زیددن المغه قادره اولورمی الجواب : اولماز .

*
**

زید « فلان فعلی ایشلرسم شرط اولسون » دیوب بعده اول فعلی ایشلسه مرادی شرط
طلاق اولیجق زیدک زوجه سی هند زیددن بوش اولورمی الجواب : اولور .

*
**

زید زوجه سی هند ایچون «فلان شیئی» با که ویرسه طلاق باین ایله بوش اولسون»
دید کدنصره هند اول شیئی» زیده ویرسه هند طلاق باین ایله بوش اولورمی الجواب :
اولور .

*
**

زید زوجه مدخول بهاسی هنده خطاباً «سنی المامق شرطیله بوشادم» دیسه واقع اولان
طلاق رجعی اولیوب باین اولورمی الجواب : اولور .

*
**

^{حضانه}
یدی یاشنده اولان هند صغیره نك حق حضانه سی باباسی زیدك اولیوب اناسنك اناسی
زینبك اولورمی الجواب : اولور .

*
**

هند صغیره نك حاضنه سی آناسی زینب نفسنی صغیره یه اجنبی یه تزویج ایدوب صغیره نك
نسواندن حاضنه احراسی اولماسه صغیره نك باباسنك باباسی زید صغیره یی زینبدن آلمغه قادر
اولورمی الجواب : اولور .

*
**

بش یاشنده اولان زید صغیرك حق حضانه سی باباسی عمرك اولمایوب اناسنك اناسی
هندك اولورمی الجواب : اولور .

*
**

هند زوج مطلق زیددن اولان صغیره قزی زینبی بحق الحضانه تربیه اوزره ایکن
زینب طقوز یاشنی تکمیل ایدوب مشهاده اولسه زید زینبی هنددن آلمغه قادر اولورمی
الجواب : اولور .

*
**

زید صغیرك حاضنه سی اناسی هند نفسنی صغیره اجنبی یه تزویج ایلسه صغیرك هنددن

غیری نسواندن آنجق عمه‌سی زینب موجوده اولمقله زینب صغیری هنددن آلوب تربیه و امسا که قادره اولورمی الجواب : اولور .

*
* *

هند صغیره نك حق حضانه‌سی لابون عمه‌سی زینك اولیوب لاب خاله‌سی خدیجه نك اولورمی الجواب : اولور .

*
* *

زید صغیرك اناسنك اناسی و حاضنه‌سی هند صغیرك مالی اولماقله صغیرك باباسی عمرو معسر اوزرینه اجرت حضانه‌ایله نفقه تقدیر ایتدیروب بسلامك ایستد کده صغیرك باباسنك اناسی زینب موسره بن صغیری اجرتسنر بسلیوب هنددن منع ایتم دیسه حاکم هنده «صغیری اجرتسنر امسا که ایله یا خود زینبه ویر» دیمکه قادرا اولورمی الجواب : اولور .

*
* *

نفقه :

پیر و معتوه اولوب کار و کسبه قدرتی اولیان زید فقیرك لاب ارقنداشی اوغلی عمرو موسردن غیری کمنه‌سی اولماسه زیدك نفقه‌سی عمرو اوزرینه لازمه اولورمی الجواب : اولور .

*
* *

کسبه قادر اولان زیدك زوجہ‌سی هندك نفقه‌سی زیدك باباسی عمرو اوزرینه لازمه اولورمی الجواب : اولماز .

*
* *

جنون مطبق ایله مجنون اولان زیدك زوجہ‌سی هند زیدك وصیسی عمرو یدنده اولان مالندن کندویه قدر معروف یومی شوقدر آچه نفقه تقدیر ایتدرسه هند مبلغ مزبوری عمرودن آلوب نفسنی انفاقه قادره اولورمی الجواب : اولور .

*
* *

زید زوجہ‌سی هندی بلا نفقه براغوب آخر دیاره کتمکه هند قاضی به واروب زید اوزرینه قدر معروف یومی شوقدر آچه نفقه تقدیر ایتدیروب برمدت کندی مالیه

کچند کد نصکره زید کلد کده هند ايله خلع اولسه هند مدت مزبورده کندی مالندن
صرف ايتديکي آچهني زیددن المغه قادره اولورمی الجواب : اولماز .

*

**

زوجی اولمیان هند فقیره نك باباسی زید موسر ايله اوغلی عمرو و قزی زینب
موسر لن غیری کسنه سی اولماسه هندك نفقه سی عمرو وزینب اوزرلینه لازمه اولورمی
الجواب : اولور .

*

**

زید زوجه مدخول بهاسی هندی طلاق باین ايله تطلیق ایتد کده هندك عدتی حیض
ایله اولق زعميله اوچ آیلق نفقه عدتی هنده تسلیم ایتد کد نصکره اوچ آی مرورنده هند
انقضاء عدته اقرار ایتکسزین حمل ادعا ایلسه هندك بقیه نفقه عدتی زید اوزرینه لازمه
اولورمی الجواب : اولور .

*

**

زید زوجه سی هندی بلا نفقه براغوب دیار آخره کیتمکه هند قاضیه واروب زید
اوزرینه قدر معروف یومی شو قدر غروش نفقه تقدیر واستدانه اذن آلوب لکن
استدانه ایتیموب برمدت مالیه کچند کد نصکره زید کلد کده فوت اولسه هند مدت مزبورده
کندی مالندن صرف ايتديکي آچهني زیدك ترکه سندن المغه قادره اولورمی الجواب :
اولماز .

*

**

زوجی اولمیان هند فقیره نك قزی زینب ايله قزینك قزلری خدیجه ورقیه ولا بوین
ارقرنداشی اوغلی زیددن غیری کسنه سی اولیوب لکن زینب وخدیجه ورقیه معسره لر
اولوب زید موسر اولسه هندك نفقه سی زید اوزرینه لازمه اولورمی الجواب : اولور .

*

**

زوجی اولمیان هند فقیره بالغه نك نفقه سی باباسی زید اوزرینه لازمه اولورمی الجواب :

اولور .

*

**

زید صغیرك مالی اولیوب باباسی عمرو دخی فقیر و محتاج اولوب عمروك باباسی بکر
موسر اولسه صغیرك نفقهسی بکر اوزرینه لازمه اولورمی الجواب : اولور .

*
**

زید زوجہسی ہندی بلا نفقہ براغوب آخر دیارہ کیتمکله ہند قاضی بہ واروب زید
اوزرینہ کندویہ قدر معروف یومی شوقدر آچہ نفقہ تقدیر واستدانہیہ اذن آلوب برمدت
استدانہ ایله کچند کدنصرکہ نفقہ مستدانہیہی آلمدین زید کلوب ہندی تطلیق ایلسہ ہند نفقہ
مستدانہیہی زیددن آلمغہ قادرہ اولورمی الجواب : اولور .

*
**

وصیت :
زید شوقدر آچہسنی اوغلی عمروہ وصیت ایتد کدنصرکہ زید فوت اولوب عمروی
وسائر ورثہسنی ترک ایلسہ سائر ورثہ وصیتی مجیزلر اولمایحق عمرو وصیت مرقومہیہ بناء
ترکدن اولقدر آچہیہی المغہ قادر اولورمی الجواب : اولماز .

*
**

ہند ثلث مالدن شوقدر آچہ تہمین و تکفینمہ صرف اولنسون دیو وصیت ایدوب
بعده فوت اولدقدہ تہمین و تکفینی وصیت مرقومہیہ بناء ثلث مالندن لازم اولیوب آنحق
زوجی زید اوزرینہ لازم اولورمی الجواب : اولور .

*
**

رید قرنداشی اولوب وارثی اولیان عمروہ فوتمدنصرکہ مالندن شوقدر آچہ ویرلسون
دیو وصیت ایتد کدنصرکہ مصرأ فوت اولسه ثلث مساعد ایکن ورثہسی وصیتی طوتمامغہ
قادر اولورلرمی الجواب : اولمازلر .

*
**

زید ثلث مالی وجوہ خیراتہ وصیت و تنفیذینہ عمروی وصی مختار نصب ایدوب مصرأ
فوت اولدقدہ ورثہسی ترکدن بر قاطری عمروہ بیع و ثمنی وجوہ خیراتہ صرف ایله
دیوب عمرو دخی آلوب اول قاطری بیع ایتیوب وصیت مرقومہیہی کندی مالندن تنفیذ

ایتمش اولسه حالا عمرو اول قاطری ورثیه ویروب کندی مالندن تنفیذ ایتدیکی مقداری زیدک ثلث ترکه سندن رجوع ایدوب آلمغه قادر اولورمی الجواب : اولور .

*
**

بربلده اهاالیسندن زید برمصلاحتی ایچون بلده اخیایه کتد کدنصکره ثلث مالندن بنم ایچون حج اولنسون دیو وصیت ایتد کده بلده اولی یا بلده ثانیه دن حج اوله دیو تعیین ایتیموب بعده بلده اخیاده مصرأ فوت اولسه ثلث مالی بلده سندن احجاج اولنمغه کفایت ایلده بلده اخیاردن احجاج اولنیموب زیدک بلده سندن احجاج اولنمق لازم اولورمی الجواب : اولور .

*
**

وصایت :

جنون مطبق ایله مجنوناً بالغ اولان زیدک باباسی عمرو زیده بکری وصی نصب ایدوب بکر دخی قبول ایتد کدنصکره عمرو فوت اولدقده قاضی عمروک زیده وصی نصب ایتدیکنی بلدین زیده بکری وصی نصب ایلسه بکر امور وصایتی کوررکن بشر مجرد بنی دخی قاضی نصب ایتدی دیو امور وصایتیه مداخله به قادر اولورمی الجواب : اولماز .

*
**

زید صغیرک حاکم طرفندن منصوب وصیتی عمرو زیدک بکر ذمتنده اولان شو قدر غروش آلاجنی بکردن دعوی ایدوب حکم ایتد کدنصکره اولقدر غروشی بکردن قبض ایتمکه قادر اولورمی الجواب : اولور .

*
**

ارث :

تبعه دولتعلیه اسلامیه دن قوچو فوت اولوب تبعه مشار الیهادن آنحق قزی پناوی ترک ایتد کده پناو قوچونک ترکه سنی احرازه قادره اولورمی الجواب : اولور .
بوصورته قوچونک تبعه اجنبیه دن اولان قزلری دخی قوچویه وارثه اولورلری الجواب : اولمازلر .

*
**

زید مسلم فوت اولوب هربری مسلملر اولان اوغللری عمرو و بکر ایله قزلری هند وزینی ترک ایتدکه ترکۀ زید الی سهمدن اولوب ایکیشر سهمی عمرو و بکره برر سهمی هند وزینه ویرلسه صحیح اولورمی الجواب : اولور .

بوصورتده زیدک غیر مسلمه اولان زوجہ سی دخی زیده وارثه اولورمی الجواب : اولماز .

*
**

زید فوت اولوب آنحق زوجہ سی هندی ترک ایتدکه ترکۀ زیدک درت سهمدن برسهمی هنده ویریلوب اوچ سهمی بیتالماله وضع اولنق لازم اولورمی الجواب : اولور .

*
**

هند غیه فوت اولدقده تجهیز و تکفینی کندی مالندن لازم اولوب زوجی زید اوزرینه لازم اولورمی الجواب : اولور .

*
**

زید صحتنده زوجہ سی هندی باینّا تطلیق ایتدکن صکره هندک عدتی ایچنده زید فوت اولسه هند زیده وارثه اولورمی الجواب : اولماز .

*
**

زید هندی تزویج ایتدکن صکره قبل الدخول هند فوت اولوب زوجی زیدی و بابایی عمروی ترک ایدوب زید ترکۀ هندن حصۀ زوج آلمق ایسته دکده عمرو سن هنده داخل اولدین هند فوت اولقله وارث اولماز سین دیوب حصه سنی اخذدن منعه قادر اولورمی الجواب : اولماز .

*
**

وقف :

زید متولیس اولدینی وقفک غله سندن شوقدر ایچینی بغیر حق کندی مصارفه صرفله استهلاك ایلسه زیده ضمان لازم اولورمی الجواب : اولور .

*
**

زید واقف وقفنه عمروی متولی نصب وتولیتی عمروه شرط ایتدکه تبدیل وتغییر

شروطی یدنده قومیبو بعد زید رأی حاکمه عمروی عزل ایدوب یرینه بکری متولی
بصب ایلسه عمرو زیده مقدما تولیتی با که شرط ایتمکه منعزل اولام دیو تولیتی بکره ضبط
ایتدیرمیوب کندی ضبطه قادر اولورمی الجواب : اولازلر .

*
**

زید واقف و قفیه معمول بهاسنده «وقفمک غله سی اخوه مک اولادی و اخوه مک اولاد
اولادی و اخوه مک ذرتی ینلرنده علی السویه تقسیم اولنه» دیو ذکر ایلسه زیدک قز قرنداشی
اولادی غله مزبورده زیدک ارقرنداشی اولادینه مشارکته قادر اولورلری الجواب : اولورلر .

*
**

اجاره :
اجرت ایله خدمت ایدر مقوله سندن اولان زید اجرت قولنسز عمروک طلیله برمدت
عمروه خدمت ایلسه زید خدمتک اجر مثلی عمرودن آلمغه قادر اولورمی الجواب : اولور .

*
**

هیه :
هند خسته لنوب لکن مصالحتی کورمه قادره اولوب غالب حالی هلاک دکل ایکن
زوجی زید ذمتنده اولان مهرینی زیده هیه ایدوب بعد زمان هند فوت اولسه سائر ورثه سی
مجرد خسته ایکن هیه ایلدی دیو هیه بی طوتمامغه قادر اولورلری الجواب : اولازلر .

*
**

زید یری ارض و کروی ملکی اولان باغئک یری اذن صاحب ارضله زوجه سی
هنده فراغ ایتهدن کرومنی هنده هیه و تسلیم ایتدکدنصکره زید فوت اولسه سائر ورثه سی
اول کروی میراثه ادخاله قادر اولورلری الجواب : اولورلر .

*
**

زید صحتنده یرلری ارض میری و بنالری ملک اولان دکرمن و چقتک منزلی صغیر
اوغلی عمروه هیه و اشهاد ایتدکدنصکره زید فوت اولسه زیدک سائر ورثه سی هیه بی
طوتمامغه قادر اولورلری الجواب : اولازلر .

*
**

زید یری ارض میری و کروی ملک اولان باغک یرینی اذن صاحب ارضله اوغلی
عمرو کیره فراغ ایتدین کرومنی عمرو هبه ایلسه هبه مزبورده صحیحه و تامه اولورمی
الجواب : اولماز .

*
**

زید یرلری ارض میری و بنالری ملک اولان دکرمن و چفتک منزلی یرلرینی اوغلی
عمرو کیره اذن صاحب ارضله فراغ ایتدین بنالرینی اوغلی عمرو هبه و تسلیم ایلسه هبه
مزبورده صحیحه اولورمی الجواب : اولور .

*
**

زید صحتنده اراضی امیریهدن طابو و مقاطعه ایله تصرفده اولان عرصهده مغروسه
اولان ملک کرومنی صغیر اوغلی عمرو سنتک نامنه هبه و اعلام و اشهاد ایتدکنصکره
زید فوت اولسه سائر ورثهسی هبهی طومتامغه قادر اولورلرمی الجواب . اولمازلر .

*
**

معاملات جواریه :

زید منزلهده احداث ایتدیکی فوقانی اوطه سنک پنجره لرندن زقاق آشوری منزلی اولان
اولان عمروک مقرنسوان اولان مواضی کورینوب حوالهسی اولسه عمرو زیده حوالهسنی
دفع ایتدیرمکه قادر اولورمی الجواب : اولور .

*
**

برقریه جریان ایدوب اهلایسی انتفاع ایده کلدکری نهر اوزرینه زید دکرمن احداث
ایلسه اهالییه ضرری اولمغله اهالی زیده بناسنی قلع ایتدیرمکه قادر اولورلرمی الجواب :
اولورلر .

*
**

اقرار :

زید مرض موتبنده «زوجهم هنده قرضدن اکیوز غروش دینم واردر» دیو اقرار
ایتدکنصکره زید فوت اولوب هندی و سائر ورثهسنی ترک ایلسه سائر ورثه زیدی

تصديق یتمايچك هند اقرار مزبورہ بناءً تركه‌دن اولقدر غروشی آلمغه قادره اولورمی

الجواب : اولماز

بوصورته هند اقرار مزبورہ بناءً مبلغ مزبورك برمقدارینی تغلباً تركه‌دن آلسه

سائر ورثه اولمقداردن حصه‌لینی هنددن آلمغه قادر اولورلرمی الجواب : اولورلر.

*
**

زيد خسته‌نوب لكن خارج یتده اولان مصالحنی كورمكه قادر اولوب غالب حالی
هلاک ذکل ايکن یتنده اولان بعض اشيا ايچون «زوجهم هند کدر بنم علاقه‌م يوقدر» ديو
اقرار ايتدکنصكره زيد فوت اولسه سائر ورثه اقرار مزبوری طوتمیوب اشياء مرقومه‌ی

ميراثه ادخاله قادر اولورلرمی الجواب : اولمازلر

*
**

زيد مولدنده مجهولة‌النسب اولوب یتنده اولان هند صغيره‌ايچون «قزمدر» ديو اقرار
ايدوب لكن هند نفسندن تعيره قادره اولمايوب تصديقه اهل اولماغله تصديق ايتيوب
بعده زيد فوت اولسه هندك نسبی زيددن ثابت اولوب زیده وارثه اولورمی الجواب : اولور

*
**

دعوی :
زيد قزنداشی اوغلی عمروایله ميراثه متعلقه دعواسندن عمروك ذمتنی ابر ايتدکنصكره

زيد خصوص مزبوری عمرودن دعوايه قادر اولورمی الجواب : اولمازلر

*
**

زيد متوفانك ورثه‌سی تركه‌سنی اقسام ايتدکلرندنصكره عمروورثه‌دن حضورلرند
زيد ذمتنده قرضدن شوقدر اچه حقم واردر ديو دعوی وورثه‌دن بكر اقرار ايدوب
سائرلر انكار ايتدکلرند عمرودعواسنه اقامت یتنه ایده‌مه‌سه دين مبلغ مزبوردن انجق
بكرك حصه‌سنه اصابت ایدن مقداری بكرك تركه‌دن مقبوضی اولان حصه وافیه‌سندن

آلمغه قادر اولورمی الجواب : اولور

*
**

زید «هنده نفسی با که تزویج ایله» دیوب هند امتناع ایتمکه زید قبل الاستکاح نفسی
با که تزویج ایتمشیدک دیو هنددن دعوی ایلسه مسموعه اولورمی الجواب : اولماز .

*
**

هند معین بعض اشیانی استننا ایدوب جمیع دعاویدن زیدی ابرا وزید دخی ابرائی
قبول ایتدکدنصکره هند استننا ایتدیکی اشیائی زیددن دعاویه قادره اولورمی الجواب :
اولور .

*
**

هند «زیدایله اولان دعوا من فراغت ایتدم» دیسه زیدی دعواستندن ابرا ایتش اولمغله
تکرار دعوی ایلسه مسموعه اولورمی الجواب : اولماز .

*
**

هند زیده کندویی تزوج ایتک ایچون ارکنلک نامنه شوقدر آچه ویروب زید دخی
هندی تزوج ایلسه هند مبلغ مزبوروی زیددن استرداد قادره اولورمی الجواب : اولور .

*
**

اشرافدن اولان هند قزی زینه جهاز نامنه شوقدر اشیا ویردکدن صکره هند اشیای
مزبورهی عازیت طریقیله ویرمشیدم دیوب و زینب هبه ایتمشیدک دیوب هند مدعاسنی
اثبات ایدمهسه هند یمنی ایله اشیاء مزبورهی زینبدن آغله قادره اولورمی الجواب : اولماز .

*
**

زید فوت اولوب اوغللاری عمرو وبکر ایله قزی هندی ترک ایتدکده جمله ترکیبی
عمرو وبکر قبض ایدوب هند حصه سنی آلیوب قرق سنه مرور ایلسه حالا هند حصه سنی
مزبورلردن طلب ایتدکده مزبورلر معترفلر ایکن مجرد قرق سنه مرور ایتمکه حَقْ
ساقط اولمش اولور دیوب ویرمامکه قادر اولورلرمی الجواب : اولماز .

*
**

شقی :
کتابی اولوب عندالذبح تسمیه کبی شرائط ذبحه تمامیلره رعایت ایدن زید نصرانینک
ذیحیسی حلال اولورمی الجواب : اولور .

بو صورتده ذبح يا نحر مقامنده حيوانك باشنه اورمقله يا باشنى بلاذبح قوپارمقله
ياخود موضع ذبحك غريدن موضع ذبحه يا نحره واصل اوليه رق كسمكله اتلاف ايديلان
حيوانك اكلى حلال اولورمى الجواب : اولماز .

*

مسلم يا كتابى اولان زيد لسان عربينك غيرى تركى ياخود قبطى لسانى اوزره تسميه
ايدوب ذبح ايتديكى قيونك اكلى حلال اولورمى الجواب : اولور .

*

زيدخسته اولوب لكن غالب حالى هلاك اوليوب خارج بيتده اولان مصالحنى كورمكه
قادر اولوب بو حال اوزره برمدت خسته اولدقدن صكره يكرمى كون مرورنده فوت
اولسه زيدك اول حال اوزره مدت مزبورده اولان خسته لكى مرض موت عد اولنق
صحيح اولورمى الجواب : اولماز .

*

**

ديات و جنايات :
زيدك زوجهى هند حامل زيدك اذنيه اسقاط جنين ايچون علاج اچمكله مستين
الحلقه برجنين ميت القا ايلسه هندك عاقله سنه ياهنده ديت ياغره لازمه اوليوب لكن
هند آئمه اولورمى الجواب : اولور .

*

**

اراضى :
زيد اراضى اميريه دن طاپو ايله تصرفنده اولان تارلايى صاحب ارض اذنتسز اوغلى
عمروه فراغ وتسليم وعمرو دخی اول تارلاده ملك تخمى نفسيچون زرع ايتدكدنصكره
زيد فوت اولوب اوغلى عمروى وساثر اولادنى ترك ايلسه حصاد ادراك ايدوب عمرو
اكيننى مستقلاً اخذ ايتك استدكده زيدك ساثر اولادى عمروه مجرد فراغ مزبورك
عدم صحتنه بناءً اول تارلا جمله مزه مشتركاً انتقال ايتكله اكينده دخی سكا مشارك
اولورز ديمكه قادر اولورلرمى الجواب : اولمازلر .

*

**

فراغ :

هند صغيره طاپو ايله تصرفده اولان تارلايى زيده فراغ ايلسه فراغ مزبور معتبر اولورمى الجواب : اولماز .

*
**

حق قرار :

زيد مدت سفر بعيد آخر دياره كتد كده عمرو زيدك اراضى اميريه دن طاپو ايله متصرف اولدينى تارلايى تغلباً ضبط ايدوب بعده زيد اون سنه مرورنده كلوب اذن صاحب ارضه اول تارلايى ضبط مراد ايتد كده عمرو مجرد اون سنه مرور ايتمكه ول تارلا بنم اولمش اولور ديو زيدى منعه قادر اولورمى الجواب : اولماز .

*
**

فراغ :

زيد اراضى اميريه دن طاپو ايله تصرفده اولان تارلايى شوقدر اچه بدل مقبوض مقابله سنده عمروه فراغ وتسليم ايدوب لكن اذن صاحب ارض بولماسه فراغ مزبور معتبر اولورمى الجواب : اولماز

بوصورته زيد بدل مرقومى عمروه رد ايدوب اول تارلايى عمرودن آلى استد كده عمرو فراغ مزبوره بناء زيدى منعه قادر اولورمى الجواب : اولماز

*
**

انتقال :

زيد بيك ايكوز سكران، درت سنه سى محرمك اون يدنجى كوفى تاريخلى فرمان عالينك صدورندن مؤخر وبيك اوجيوز اوتوز برسهنسى ربيع الاولنك يكرمى يدنجى كوفى تاريخلى فرمان عالينك نشرندن مقدم اراضى اميريه دن برترلايه طاپو ايله متصرف ايكن فوت اولوب اصحاب انتقالدن درجه ده مقدم آنجق لاب ار قرداشلى عمرو وبكر وبشرى وزوجه لرى هند وزينى ترك ايتد كده مزبورلر بر موجب امر سلطانى اول تارلانك خرج انتقالنى ويروب ثلثه اربعنى عمرو وبكر وبشر وبربعى هند وزينى بلا بدل ضبط ايتك استدكارنده زيدك لام قرداشى اول تارلاده مزبورلر مشاركته قادر اولورمى الجواب : اولماز .

